

Obraćanje visokog predstavnika, Christiana Schwarz-Schillinga, povodom dodjele nagrada nakon održavanja međunarodnog skijaškog takmičenja na Igmanu: “Turizam i šumarstvo mogu donijeti nova radna mjesta”

– Provjeriti nakon obraćanja –

Sponzorisala njemačka pokrajina Hessen

Dame i gospodo,

Izuzetno mi je zadovoljstvo što učestvujem u ovom događaju, koji je povezao moju domovinu u Njemačkoj, pokrajinu Hessen, i Bosnu i Hercegovinu.

Turnir u nordijskom skijanju koji je upravo okončan predstavlja izvrsnu reklamu za alpski turizam, jedan od najperspektivnijih ekonomskih sektora Bosne i Hercegovine, koji je, ipak, još uvijek nedovoljno razvijen.

Pokrajina Hessen sarađuje sa partnerima u BiH na projektima gazdovanja šumama, a sektor šumarstva, kao što vam je svima poznato, predstavlja još jedan potencijalno veoma značajan

faktor poslijeratnog ekonomskog i socijalnog oporavka Bosne i Hercegovine. Ovaj sektor ima ogroman ekonomski potencijal ali njime se ne upravlja na adekvatan način; koliko znam trenutno se poduzimaju veoma intenzivne aktivnosti na rješavanju ovih problema, između ostalog poduzimaju se mjere na osnovu revizorskih izvještaja.

Dakle, ovaj prvenstveno *sportski* događaj ipak se dotiče dva ključna ekonomska potencijala Bosne i Hercegovine – turizma i šumarstva.

Mislim da sve vas koji ste ove sedmice učestvovali u turniru ili doputovali ovdje kao posmatrači ne treba uvjeravati kako međunarodne turiste u Bosni i Hercegovini očekuje jedno doista *posebno* iskustvo.

Ovo je zemlja u kojoj gostoljubivost još uvijek predstavlja način života, i još nije pretvorena u privrednu granu. Naravno, mi *želimo* to pretvoriti u značajnu privrednu granu, jer vjerujemo da se turizam može razviti u jedan od strateških nosilaca ekonomskog razvoja, kao što je to bio slučaj u drugim zemljama poput Španije, Grčke i Turske, ali također želimo biti potpuno sigurni da sve osobenosti BiH, jedinstvene topografske, kulturne i kulinarske tradicije, ne budu izgubljene u razvoju masovnog turizma.

Zajedno sa bh. organima vlasti već smo aktivno angažirani u nastojanjima da se modernizira koordinacija i upravljanje u oblasti turizma, te reklamiranje BiH kao međunarodne turističke destinacije.

Planinski centar Bjelašnica-Igman odličan je primjer šta se može postići adekvatnim upravljanjem i razvojem postojećih potencijala. Naša je procjena da bi samo ovaj centar, kada bude u potpunosti razvijen, mogao donijeti i do 5,000 novih radnih mjesta u sarajevskoj regiji. Ako se to može ostvariti na Bjelašnici, može se ostvariti i u drugim mjestima širom BiH.

Dozvolite mi da još jednom poželim srdačnu dobrodošlicu gostima iz Hessena i iskažem našu zahvalnost pokrajini Hessen na saradnji koja je ostvarena u razvoju dva ključna ekonomska sektora u BiH. Ova saradnja je zasnovana na čvrstim komercijalnim principima, ali istovremeno odražava iskreno prijateljstvo koje postoji između građana BiH i građana Njemačke.

A sada, izuzetno mi je zadovoljstvo izabrati pobjednike, koji će dobiti karte za ovogodišnje Svjetsko fudbalsko prvenstvo u Njemačkoj, koje je donirala savezna pokrajina Hesen!

Hvala.